

Wasifu wa Sheikh Naasir-ud-Deen al-Albaanee (rahimahullah)

Qur'an wa Sunnah Society of East Africa - <http://www.qssea.net>



Wasifu Kwa Mukhtasar Wa
Ash-Sheikh Al-Muhaddith Abu 'Abdir-Rahmaan
Muhammad Naasir-Ud-Deen Al-Albaani
(k. 1420H / k. 1999C.E) (Rahimahullaah)

Imetayarishwa Na: Abu Farida Muhammad Awadh Basawad

Sheikh Muhammad al-Haaj Nooh Najjaatee al-Albaani (*Rahimahullaah*) alizaliwa katika mji wa Ashkoderi, uliokuwa katika wakati huo ndio mji mkuu wa Albania mwaka wa 1332 H (inayoafikiana na 1914 C.E) kutoka katika jamii ya kimasikini. Babake, al-Haaj Nooh Najjaatee al-Albaani alikamilisha masomo yake ya 'Ilmu ya Sharee'ah mjini Istanbul na akarudi kwao Albania akiwa ni mwanachuoni wa madh-hab ya *ki-Hanafee*. Baada ya nchi ya Albania kutawaliwa na makafiri wasioamini Mungu, jamii yake yote, chini ya uongozi wa babake, iliamua kuhamisha makaazi yao hadi katika miji ya ki-Islamu. Wakenda kuishi Damascus huko Syria. Alipokuwa huko Damascus, Sheikh Al-Albaani alikamilisha masomo yake ya kimsingi na baadae akasomesha Qur'aan, Tajweed, utaalumu wa lugha ya kiarabu, somo la fiqh ya madh-hab ya Hanafee na 'ilmu nyengine mbalimbali za dini. Alisoma masomo yote hayo chini ya mashekhe tafauti tafauti wakiwemo marafiki zake babake.

Vilevile alipata wasaa wa kusomea ujuzi wa utengezaji wa saa kutoka kwa babake - ujuzi huo ukampa umaarufu mkubwa mpaka akawa ni mwenye kuendeleza maisha yake kutokana na mapato ya kazi yake hiyo. Sheikh alipendezwa mno na makala yaliyokuwa yakitolewa katika jarida la 'al-Manar', na jambo hilo likamtia hima kwa upande wa masomo, ndio akaanza kutaalamika katika ukumbi wa 'ilmu ya hadeeth na masomo mengine yenye kuhusiana nayo akiwa na umri wa miaka 20.

Akaanza shughuli katika *fanni* hii kwa kunukuu kitabu kinachostahili kukumbukwa cha '*al-Mughnee an-hamlil-Asfaar fil Asfaar fee takhreej maafil-Ihya minal-Akhbaar*' kilichoandikwa na al-Haafidh al-'Iraaqee. Nae akaongezea nikta zake katika kulinukuu kitabu hicho.

Akabobea zaidi kwenye bahari ya *Hadeeth* na vitagaa vyake vya kitaalamu licha ya kuvunjwa moyo na babake. Zaidi ya hayo, hakupata baadhi ya vitabu alivyokuwa akivihitaji katika maktaba ya babake ambayo, kwa hakika ilikuwa na vitabu vya fiqh ya *ki-Hanafee*. Sasa kwa vile Sheikh hakuwa na uwezo wa kununua vitabu vyingi alivyohitaji na visivyopatikana katika maktaba hiyo ya babake, akaanza kuazima vitabu kutoka katika maktaba mashuhuri ya Damascus - 'al-Maktabatuz-Zaahiriyyah' au hata mara nyengine kutoka katika maduka ya wauzaji vitabu.

Alizama kabisa katika utaalumu wa Hadeeth mpaka ikambidi mara nyengine awe akifunga duka lake (la shughuli za kutengeneza saa), na abakie kwenye maktaba bila ya kuondoka kwa muda wa hadi masaa kumi na mbili - akikatiza shughuli hiyo kwa ajili ya kwenda kuswali tu - na hakuwa akiondoka kwenda kula, lakini badala yake alikuwa akibeba kumbwe (chakula chepesi) zake kama mbili hivi kila siku.

Hatimae idara ya pale maktaba ikamruhusu na kumpa chumba maalum kwa shughuli zake za ki-masomo na kumkabidhi ufunguo wake maalum wa kuweza kuingia hapo maktaba kabla ya nyakati za ufunguzi za kawaida. Mara kwa mara, Sheikh hubakia kwenye rumba hilo la uchambuzi wa 'ilmu kuanzia asubuhi na mapema hadi baada ya 'ishaa'. Katika wakati huwo, alifaidi kuandika vitabu vyingi sana vyenye manufaa - vyingi ambavyo hadi leo havijachapishwa.

Usomaji wa Sheikh al-Albaani wa hili somo la hadeeth za Mtume wa Mwenyezi Mungu (*Sallallahu 'alayhi wasallam*) ulimsaidia sana yeye mwenyewe na kumuathiri na hatimae kumfanya ageuze msimamo wake na kujiepusha na kufuata ki-Upofu madh-hab yake ya awali, na badala yake kukubali na kuandama Qur'aan na Sunnah - kulingana na ufahamu wa watu

wema waliotutangulia (*As-Salafus Saalih*). Kwa kawaida, jambo hili linamaanisha yakwamba mara nyengine alikuwa akitafautiana na baadhi ya mashekhe wa pale mjini ambao waliokuwa wakiandama *ki-Upofu* madh-hab ya *ki-Hanafee*, na vilevile maimamu wa ki-Soofee na wazushi wa hapo mjini walioanza kumpinga na kuwachochea watu wa kawaida kwa kumbandika jina la “Mpotofu wa ki-Wahhaabi”. Hata hivyo, Sheikh alipewa moyo na baadhi ya mashekhe waheshimiwa wa Damascus aendeleo, miongoni mwao ni Sheikh Bahjatul Baijaar, Imaam - Sheikh ‘Abdul-Fattaah, na Tawfeeq al-Barzah (*rahimahullaah*).

Kwahivyo, Sheikh alipambana na upinzani mkubwa sana katika juhudi zake za ulinganizi wa Tawheed na Sunnah lakini alijitweka hayo kwa kuvumilia na kusubiri.

Baada ya muda akaanza kutoa *Darsa* mara mbili kwa wiki na kuhudhuriwa na wanafunzi wa ki-elimu na waalimu wa chuo-kikuu - ambapo akafundisha vitabu mbalimbali vya ‘Aqeedah, Fiqh, Usool na utaalumu wa *Hadeeth*.

Pia Sheikh al-Albaani akaanza kutayarisha na kupanga misafara ya *ki-Da’wah* katika sehemu mbalimbali za miji ya Syria na kisha Jordan.

Baada ya idadi ya vitabu vyake kuchapishwa na kuonekana, Sheikh alichaguliwa kufundisha *Hadeeth* katika Chuo kikuu kipya kilichoko al-Madeenah, Saudi Arabia, kwa muda wa miaka mitatu kuanzia 1381H hadi 1383H - ambapo nae pia alikuwa ni mwanachama wa kamati ya Chuo kikuu.

Baadae, Sheikh akarudia tena masomo na shughuli zake za awali katika ‘al-Maktabatuz-Zaahiriyyah’ na huku akamkabidhi duka lake la saa mmojawapo wa nduguze ili aliendeleze.

Aliwahi kufanya ziara katika nchi mbalimbali kwa malengo ya Da’wah na kuandaa ma-Darsa - pakiwemo miongoni mwa nchi, kama vile Qatar, Egypt (Misri), Kuwait, Emirates (U.A.E), Spain na England (Uingereza).

Alilazimika kuhama mara chungu nzima kwa kusafiri kutoka Syria hadi Jordan, kisha Syria tena, kisha Beirut, kisha Emirates (U.A.E), kisha tena akarudi’Ammann, Jordan, ambapo ndipo alipovuta pumzi zake za mwisho mnamo 1420H (sawa na Oct 1999C.E) na kuaga Dunia (*Rahimahullaah*).

Vitabu alivyowahi kuandika - khaswa kwenye ukumbi wa Hadeeth na utaalumu wake ni zaidi ya 100.

Wanafunzi wake ni wengi wakiwemo miongoni mwao ma-Shekhe wakubwa hivi sasa katika Ulimwengu, nao ni: Sheikh Hamdee ‘Abdul-Majeed as-Salafee, Sheikh Muhammad ‘Eed ‘Abbaasee, Dr. ‘Umar Sulaimaan al-Ashqar, Sheikh Muhammad Ibraheem Shaqrah, Sheikh Muqbil ibn Haadee al-Waadi’ee (*Rahimahullaah*), Sheikh ‘Alee Khushshaan, Sheikh Muhammad Jameel Zainoo, Sheikh ‘Abdur-Rahmaan ‘Abdus-Samad, Sheikh ‘Alee Hassan ‘Abdul-Hameed al-Halabee, Sheikh Saleem ibn ‘Eid al-Hilaalee, Sheikh ‘Abdur-Rahmaan ‘Abdul-Khaaliq.